

‘NA SULA CAMPATA

Arrivi rô scuru.

‘N ciantu ‘ncuzzatu t’ adduma ‘a cannila,
e, rapiennu l’uocci,
‘i mumentu t’ammustrunu ‘a luci.
Sicutunu l’uri, s’alloncunu ‘i jorna e ‘i misi.
E cuannu ‘i misi si cuntunu nê ru’ manu,
vai rutuliannu a cuattru pièri casa casa.

All’annu t’addrizzi ‘ntrabballiannu,
e nê jtedda cunti :unu !
E puoi rui, e puoi tri.....
‘U siècutu è ‘n ponti,
a ‘na sula campata,
ri anni, unu appriessu all’autru,
‘ntaviddata.
‘U prugiettu è ppi cientu,
ma trattabili, comu si rici,
Vai avanti, taliànnu luntanu,
apprièssu ô ristinu,
stritta ‘a cannila nâ manu,
stritta all’arma vicinu.

Ma ‘na sira,
cuannu s’arriva all’altra punta.
‘u senti
ca s’accurzunu ‘i jorna,
e scappunu l’uri,
e ‘a spranza all’ùtimu è gghiunta
ca armenu ti cianciunu ‘i mumentu
e, stutannu ‘a cannila,
ti ciurunu l’uocci.
E tuorni ô scuru.